

Enamez l'Europa en flommas

Il Romand Charles Journet truava la malignadad

DA GUIU SOBIELA-CAANITZ

■ **La barriera dal linguatg ans impedescha savens da far stim ch'era ils Romands han contribuì a la discussiun dal davos temp davart la Svizra en ils onns trenta e quaranta.** Da questa vart da la Sarina han ins percurschi memia pauc il mez tozzel cudeschs publicgads dapi 1995 en lez connex a Genevra, Losanna, Neuchâtel e Saint-Maurice. A la chasa editura da la claustra fundada enturn 515 en questa davosa citad engraz'ins ina contribuziun da vaglia a talas perscrutaziuns. L'istoricher Guy Boissard ha scrit ina biografia detagliada¹⁾ dal Genevrin Charles Journet (1891-1975) en quel temp, cura ch'il futur cardinal instruiva teologia a Friburg e Genevra. Grazia a sia amicitia cun il filosof catolic franzos Jacques Maritain (1882-1973), lezza giada professer en l'America, truava Journet sco paucs auters la malignadad da la politica razzista da Hitler e cumplizis. Sur Charles n'ha betg agì be en Romandia, nua ch'el avess fatg anc dapli sche ses uestg en l'avess adina puspè frenà. Journet ha era gidà e stimulà quels Franzos che refusavan il cumportament da lur stadi.

L'amur per la Svizra romanda

«1926 han Journet e ses commiliton anteriur François Charrière, pli tard uestg da la diocesa, fundà 'Nova et Vetera', revista trimestriala da reflexiun teologica, filosofica, religiusa e culturala» (p. 435). En l'emprim numer ha sur Charles exprimì sia amur per la Svizra romanda, «sia fatscha, las lingias da Rodan e Giura che malegian sia unitad spaziusa (...). Noss cor sa giudair il silenzi sontg e l'intimitad miaivla da las sairas d'atun a La Valsainte/FR; il Lai pitschen da Genevra, circumdà da villas e che fa endament la Corna d'aur [ad Istanbul, GSC] u las rivas da la mar en Grezia; (...) ils culms da Vad e Savoia, romantics e famigliars, reflectads bufatg dal medem lai; Neuchâtel la notg, vesì da la riva da Friburg. Nus charezzain er instituziuns ed ovras dals carstgauns che vivan qua, uschè lunsch ch'ellas èn saunas e legitimas» (cità p. 118; suttastritgà da Journet).

Tranter dus mals

Noss teolog ha mussà colur gia ils 3 da settember 1935 en in referat. «El ha fatg attent a las nodas dals totalitarissem cun lur mitus – mitus dal stadi, da las classas socialas u da la razza (...). Lur ha' declerà che cristians na possian sustegnair nagina furma dal totalitarissem d'oz (...). Dastg'ins acceptar ina ad interim per cumbatter in'otra cun efficacitad? Dastg'ins acceptar ad interim il razzissem e la deificaziun dal stadi (...)? Quai fiss ina tuppada» (p. 41). Lezs pleds fan endament profezias biblicas encunter in retg en Israel che sa fidava dal'Egipta per sa liberar da l'Assiria: «La tempesta vegn a manizzar il refugi engianus, l'aua a dercher surengiu il zup. Vossa lia cun la mort vegn rutta (...). Il flagè dal torrent vegn ad as smardegliar (...). Paupers quels che van or en l'Egipta (...) per sa refugiar sur la protecziun da Faraò! La defensiun entras lez vegn a trumpar vus» (Jesaja, 28: 17-18; 30: 2-3).

L'engion da la «guerra sontga»

Cun quella regla d'aur ha sur Charles guiditgà la guerra spagnola (1936-1939), pia la rebelliun armada da Francisco Franco (1892-1975) ed auters generals encunter la republica anticlericala. Bunamain tuts uestgs spagnols han firmà ina brev da sustegn a lezza uscheditga cruschada. «La Baselia catolica sa chattava en in dilemma snuavel. Spirituals e cartents vegniván spogliads, impraschunads e mazzads en Russia e Spagna (...). Il fashissem talian sa dava in'apparienttscha da cristianadad (...). [Quel da Franco] identifitgava tuts ses oppo-

nents, senza differenziar, cun il communissem, sa preschentava sco defensur dals catolics e schizunt, sco che Journet scheva, 'enzugliava sia guerra cun la guerra sontga', duvond las metodos crudaiplas da ses adversaris» (pp. 44-45). Journet sustegnava quels catolics spagnols che demascravan l'engion da la cruschada e levan ir ina terza via, sco il cardinal catalan Francesc Vidal i Barraquer (1868-1943) che ha stuì ir en l'exil e passentar ses davos onns da vita en la chartusia da La Valsainte. Era noss teolog dal reminent stava gugent adina puspè en lez «parvis alv» (p. 363), alv sco la rassa dals chartusians.

La censura admonescha l'evidenza

Sco publicist ha noss teolog stuì endirar duas giadas la censura militar. Lezza ha sa drizzada en december 1941 encunter texts da dus prelats esters, il patriarc da Lisboa cardinal Manuel Gonsalves Cerejeira (1888-1977) e l'uestg da Münster (Vestfalia) Clemens August cont von Galen (1878-1946). Cerejeira aveva scrit 1938, en connex cun la guerra spagnola: «Ils rescims da persecuziun che sa glorian d'avair spendrà l'Europa dal communissem na san, sco che l'evangeli di, da che spiert ch'els derivan (...). La baselia n'ha betg condemnà il communissem per defender ils tresors dals ritgs, mabain perquai che lez cuntradescha a la natira ed a Dieu» (cità p. 185). Von Galen aveva predeggià cunter la persecuziun religiusa en sia diocesa ed ils mazzaments d'impedids entras la Germania. La revista cun l'essai da Journet che citava ils dus prelats è vegnida reternida varsaquants dis dal manader da la censura militar. Il medem chapitani ha admonì 1943 Journet sco directur da «Nova et Vetera» pervi d'in artigel inua che lez aveva descrit e condemnà il terrorissem da las autoritads tudestgas d'occupaziun, cunzunt en Pologna, ed ils bombardaments da populaziuns civilas entras ils alliads. Il teolog ha lura replitgà cun ina brev che Boissard citescha tuttafatg; qua in toc sutlingià da Journet sez: «Nagin na gughegia da pretender ch'ins [la Germania, GSC] na planiseschia betg l'extirpaziun dals gidieus e la sclavitid dals Polacs. Quai fiss snegar l'evidenza» (cità p. 192). Gia 1941 aveva Journet deditgà in numer special da «Nova et Vetera» a la cultura polacca, «in salid commovì e plain respect dal pievelet dals culms, fin ussa schanegià, al grond pievel da las planiras, oz sblundregià» (cità p. 242).

La Frantscha ha gidà Hitler

Cumparegliada cun la Pologna era l'occupaziun tudestga en Frantscha relativamain miaivla, schebain che questa aveva declerà sezza 1939 la guerra a la Germania. Enfin a 1942 èn ina part da l'intschess franzos, tranter Genevra e las Pireneas, ed ils possess africans da Frantscha restads inoccupads. Ma il schef da stadi marschal Philippe Pétain (1856-1951) ha abolì la democrazia e decretà mesiras encunter ils gidieus sco tals. Plaun plaun s'organisava l'opposiziun cristiandemocrata, cunzunt enturn ils gesuits da Lyon, cun l'agid d'in preditgant da là, in teolog reformà oriund da Neuchâtel. 1941 han ins publicgà l'emprim «Cahier du Témoignage chrétien» («témoignage» = «perditga») cun in editorial entitulà: «Frantscha, ta pertgira da perder tia olma!» (p. 215). Cun l'occupaziun totala da Frantscha 1942 èn creschids il squitsch ed era la resistenza. En favrer 1944, pia quatter mais avant l'arriv dals deliberaturs americans en Normandia, è il «Courrier français du Témoignage chrétien» cumparì cun in editorial firmà «C.J. – in da noss amitgs svizzers». Lezzas lingias da Journet truavan l'agid politic dal stadi franzos a Hitler dapi l'armistizi da 1940: «L'emprim ha' violà il dretg cristian, il

dretg natiral, il dretg internaziunal surdond fugitivs politics al victur. Lura (...) n'ha' betg targlinà da lavurar daveras e cun intenziun, en maniera snuavela, ad extirpar ina cuminanza entira, fond obedienscha a l'odi dals victurs encunter ils gidieus» (cità p. 219). Pir Jacques Chirac, president da la Republica franzosa dapi 1995, ha reconuschì en tutta forma la culpa da Frantscha tar la deportaziun da passa 60 000 gidieus. Gia 1938 aveva Maritain profetisà en furma mez ironica: «Insicura refutesch'ins quels istorichers malvulents che disfameschan il mund catolic per sias cumplitads cun las pussanzas da charn. Lura chatt'ins gugent (...) en l'archiv da noss temp in pèr catolics che han protestà (...) encunter las persecuziuns antisemitas» (cità p. 61).

«A mai avais dà ospitalidà»

Journet n'ha betg be condemnà la surdada da fugitivs entras Pétain. Ils 27 da schaner 1944 ha la «Gazette de Lausanne» publicgà «in appel dal scriptur vadais René Morax a favur dals fugitivs» (p. 272). Sur Charles l'ha sustegnì, sa giustifitgond en in essai da «Nova et Vetera» cun rinviants a Mattieu 25: 35 e 42: «Nagin na dastga refusar d'accomplir il devoir d'ospitalidà. 'Jau aveva fom, jau aveva said, jau era ester.' Lezs pleds dudinsa tuts insacura. Ils ins vegnan anc a dudir in misteri extraordinari: 'A mai avais dà spaisa, bavronda, ospitalidà.' Per tshels datti lura sentenzias sgarschavlas: 'A mai nun avais dà spaisa, ni bavronda, ni ospitalidà.' (...) Nossa patria pitschna na merita dapli ch'autras. Tuttina rest'la schanegiada, entant ch'il mund entir è en flommas. Lezza excepziun ans dat il devoir absolut da gidar las unfrendas da la catastrofa enfin al davos cunfin dal pussavel (...). Ils fugitivs ch'entran en contact cun nossas populaziuns civilas stiman fitg lur virtids da cordialitad, umanitad ed ospitalidà. Ins sto simplamain admirar co che millis da noss confederads accumpleschan ils dovoirs d'ospitalidà (...) enfin ad ina grondezza stgetta e commoventa (...). Quai è la vaira Svizra, tgirunza da l'Europa» (cità pp. 272-274).

Per in mund pli gist

«Sunter il drama n'emblida mai ch'il salvament dal pajais è resultà cunzunt da la protecziun divina» (cità p. 319). Noss teolog ha commentà questa sentenza, formulada da general Henri Guisan (1874-1960) en il «Rapport a l'Assemblea federala davart il servetsch activ 1939-1945». Journet: «Dieu sa zuppa en il mund per quels che bittan Dieu ord lur cors (...) ed èn oramai persvas ch'il mund saja tuttafatg absurd, crudavel e manzegnus» (cità p. 343). Tenor sur Charles duev'ins metter fin a «la spartiziun irrevocabla tranter morala e politica» (cità p. 339). El sperava en in mund «cun damain malgestia», saveva ch'i dat adina «larmas, malencurada, suffrienscha, putgà, violenza e guerras» ed appellava tuttina a promover «dapli gistia, confidenza reciproca ed amicitia» (cità p. 345). La gistia per el cumpigliava «il dretg da viver per mintga naziun, la reducziun dals armaments, in urden giuridic internaziunal, resguard per las pretensiuns legitimas da pievels e minoritads etnicas» (p. 332), sco er, tenor ses agens pleds, «la dignitad persunala dals lavurers, las cundiziuns da lur lavur ed ils dretgs da lur famiglias» (cità p. 334). Encunter il naziunalissem recumandava'l da «reveder il princip da suveranità naziunala» (cità p. 348). Co fiss quai cun in tal program per il 21avel tschientaner?

* Guy Boissard, *Quelle neutralité face à l'horreur? Le courage de Charles Journet. Cunt in epilog da pader Georges Cottier OP. Saint-Maurice (Editions Saint-Augustin, ISBN 2-88011-179-X) 2000, 456 pp.*